



Selasa, 27 Oktober 2020
Ogen: Galati 6: 10



Tetap Erbahan Si Mehuli



Cuba sirenungken kalimat-kalimat enda:

Kalak si deban banci ngelakoken si jahat man banta,
Tapi kita arus tetap jadi kalak si erbalas mehuli man bana.

Bebasken dirinta ngaloken perbahanen kalak si la mehuli,

Tapi ola bebasken dirinta guna erbahan si la mehuli man bana.

Tuhu kita la banci milih guna la isakiti kalak,

Tapi kita banci milih sikap guna la nakiti kalak

Tetap erbahan si mehuli em jadi temanta. Mehuli ertina; 1. Elok, ibas perkatan ras sikap, lit teridah tanggungjawab i bas kai si ilakoken kita. 2.

Patut, ngelakoken dahin si enggo endesken man banta, ije pe teridah tanggungjawab. 3. Terhormat tanpa cela, ertina i bas ndahiken dahin si

palapalai si mehulina, la meros i bas ndahikensa. 4. Patut dikagumi. Nampati kalak, nggeluh disiplin, erguna geluhta man kalak si deban. La

jore pusuhta ngidah kalak nggeluh bas kepiceten, entah temanta sangana eraru ate. Mis si buat baginta napatisa. Erbahn mehuli enda labo mesunah.

Perlu berjuang i bas perukuren guna teridah i bas pengerana ras perbahanen. Tapi, perlu si inget maka kita itepa Dibata jadi manusia si

sentudu ras tempasNa. Tempas Dibata e me rikut ras biak-biak si mehuli i bas IA. Ibereken kita perukuren, terlebih guna tetap milih dengen

ngelakoken si mehuli bagi si ngena akap Dibata. Payo secara manusia, lit 2 si tetap mpengaruhi kita i bas perukurenta enda, eme: si mehuli ras la

mehuli. Duana enda banci jadi kebiasaan i bas dirinta adi si usur-usur ndalankenca. Emaka siperjuangkenlah tetap ndalanken si mehuli!

Bagi oratenta sendah, rasul Paulus nurikenca: "I bas teptep kesempatan bahanlah si mehuli man kerina manusia....." kesempatan si mbelinna

guna ndalanken si mehuli eme asum kita nggeluh denga. I bas kegeluhenta enda enggo isuraken Dibata ndalanken si mehuli asa gegeh ras kengasupenta. Perlebe man kalak si sada kinitekenta, gelah teman si

sada kiniteken e nggejapken persadan ras Kristus arah kita geluh si sampaten ras si kelengen. Penggejapen si enggo lit i bas ia e ilakokenna

ka man se isi jabuna, emaka ku tengah-tengah perpulungen. Perbahanen mehuli enda dunga ipeseh man kalak si la sada kiniteken ras kita gelah

itandaina ras igejapna kekelengen Tuhan Jesus e. Terpujilah Tuhan.